

ԵՎՐՈՊԱՅԻ ՔՐԻՍՏՈՆՅԱ ԵԿԵՂԵՑԻՆԵՐԻ ՀԱՄԱԳՈՒՍԱՐԸ

Հոկտեմբերի 2—7-ին, Դանիայի Նուբորգ քաղաքում կայացավ Եվրոպայի քրիստոնեական եկեղեցիների համագումարը:

Համագումարին իրենց մասնակցությունն են բերել Գերմանիայի, Դանիայի, Բելգիայի, Հոլանդիայի, Ֆինլանդիայի, Հունաստանի, Մեծն Բրիտանիայի, Իտալիայի, Սովետական Միության, Հարավսլավիայի, Կիպրոսի, Ավստրիայի, Նորվեգիայի, Լեհաստանի, Շվեդիայի, Շվեյցարիայի, Ջեխոսլովակիայի և Հունգարիայի քրիստոնեական եկեղեցիների ներկայացուցիչները:

Համագումարին մասնակցող ավելի քան 200 պատգամավորների թվում ներկա էր նաև եկեղեցիների Համաշխարհային հորհրդի ընդհանուր քարտուղար դոկտ. Վիլյամ Վիսսերտ դը Հուֆտը Ժնևից:

Վեհափառ Հայրապետի հրամանով և Գերագույն Հոգևոր հորհրդի որոշմամբ, Հայ եկեղեցու կողմից համագումարին ներկա էր Մոսկվայի հայոց հոգևոր հովիվ հոգեշնորհ Տ. Պարգև վարդապետ Գևորգյանը:

Հոկտեմբերի 3-ին, երեկոյան ժամը 7-ին, հատուկ աղոթքից հետո սկսվում է համագումարի առաջին նիստը: Համագումարի նախագահ Դ. Լիլիեն Կպիսկոպոսը բացատրում է համագումարի նպատակը և Եվրոպայի քրիստոնեական եկեղեցիների ներկայացուցիչներին մաղթում հաջողություն: Ապա համագումարում ելույթ են ունենում մի շարք եկեղեցիների ներկայացուցիչներ՝ ողջունելով բոլոր ժողովականներին: Դրանով փակվում է առաջին օրվա նիստը:

Հաջորդ օրը, հոկտեմբերի 4-ին, աղոթքից հետո սկսվում է համագումարի երկրորդ նիստը, որտեղ «Քերխեն ուերդ» ինստիտուտի ղեկավար դոկտ. Վայն Լիվեյնը (Հոլանդիա) կարդում է բովանդակալից զեկուցում՝ «Քրիստոնեական եկեղեցու առաքելության մասին մեր օրերում» թեմայով:

Ջեկուցման ընթերցումից հետո ժողովականները բաժանվում են չորս առանձին խմբերի, որոնցից յուրաքանչյուրը քննարկում է համագումարի օրակարգում դրված հարցերից մեկը: Քննարկման աշխատանքներին մասնակցում է նաև հոգեշնորհ Տ. Պարգև վարդապետ Գևորգյանը, հանդես գալով ողջույնի խոսքով:

Հոկտեմբերի 5-ի և 6-ի նիստերում կարդացվում և քննարկվում են պրոֆ. դոկտ. Ժ. Բ. Ժեսչի (Պրագա) «Եկեղեցու դերը մեր խոռվահույզ ժամանակներում» և դոկտ. Ն. Ա. Նիսիոդիսի (Հունաստան) «Եկեղեցիների ծառայությունը միմյանց միջև» զեկուցումները:

Հոկտեմբերի 7-ի առավոտյան նիստին Եվրոպայի քրիստոնեական եկեղեցիների համագումարի ներկայացուցիչներին ողջունում է Դանիայի կրոնական գործերի մինիստրը:

Նույն օրվա եզրափակիչ նիստում կարդացվում են համագումարի յուրաքանչյուր խմբում քննարկվող խնդիրների վերջնական բանաձևերը: Դրանով էլ ավարտվում են համագումարի աշխատանքները:

